

佛說八種長養功德經

宋西天三藏朝教大矣訶騰摩得梵大師法護等奉 詔譯

歸命一切佛惟願一切佛菩薩衆攝受於我
即說伽陀頌曰

我今歸命勝菩提 最上清淨佛法衆

我發廣大菩提心 自他利益皆成就

懺除一切不善業 隨喜無邊衆福蘊

先當不食一日中 後修八衆長養法

當知八種長養法者所謂八戒弟子應於阿

闍梨前三重復說是伽陀已次復當稱已

之名字我名某甲惟願阿闍梨攝受於我我

從今時發淨信心乃至坐菩提場成等正覺

誓歸依佛二足勝尊誓歸依法離欲勝尊誓

歸依僧調伏勝尊如三寶是所歸趣我某

甲淨信優婆塞惟願阿闍梨憶持護念我從

今日今時發起淨心乃至過是夜分訖於明
旦日初出時於其中間奉持八戒所謂一不
殺生二不偷盜三不非梵行四不妄語五不
飲酒六不非時食七不華鬘莊嚴其身及歌
舞戲等八不坐卧高廣大牀我今捨離如是
等事誓願不捨清淨禁戒八種功德二三重
復作如是說又言我持戒行莊嚴其心令心
喜悅廣修一切相應勝行求成佛果究竟圓
滿又說伽陀曰

我發無二最上心 爲諸衆生不請友

勝菩提行善所行 成佛世間廣利益

願我乘是善業故 此世不久成正覺

說法饒益於世間 解脫衆生三有苦

佛說八種長養功德經

